

平閩紀卷之九目錄

咨文

請復邊海咨兩院

飛報恢復咨兩院

飛報克取咨兩院

題報勦殺咨督院

請掛糧餉咨督院

借領月餉咨督院

飛報恢復咨兵部



飛報克取咨兵部

飛報大捷咨督院

請旨事咨督院

邊海要島咨督院

嚴查私藏咨撫院

嚴飭巡拿咨

兩院水提

嚴查私藏咨撫院

咨請酌給咨兩院

修葺城垣等事咨

督兩院撫

稟報事咨漳浦鎮

密報事咨督院

審報事咨吳部堂

平園紀卷之九

懋紹漁山

三韓楊 捷元凱著 男懋緒令鴻纂

懋綸今掌

請復邊海咨兩院

為請復邊海遷民故業等事本月初二日准 貴部
院咨開准 兵部咨前事等因到部院准此合咨查
照酌議王棗會 題施行等因到將軍准此案照先
准 兵部咨同前事業經本將軍於四月二十七日

備咨 貴部院察照酌議主稿會 題去後今准

大咨酌議查開展邊界俾遷民復歸故業誠有裨於國計民生但釋 部咨之內有海寇尚在廣東沿海地方游移尚未剿滅海界照舊展復所關甚爲緊要等語是 內部於此極其慎重况鄭經劉國軒現在澎湖臺灣等處猶思收集散亾餘孽希圖窺伺若邊界遽開則奸民之接濟無從稽查而細作之往來亦難盤詰沿邊二千餘里處處可以登犯萬一逆賊順風乘潮連舫突至沿海奸民爲之勾引內應藉寇兵而齎盜糧豈不可虞是日前展界固有裨於

國計民生倘遊覓竊逞再需大兵進勦將浩費錢糧悉反多於所入矣本將軍管見似應俟澎湖廣東二處餘逆指日掃盡之後再行展界可也是否有當合就咨覆爲此備咨 貴部院請煩察照酌奪施行

康熙十九年五月初七日

飛報恢復咨兩院

爲飛報恢復海澄縣城等事本年五月二十二日准
兵部咨開職方清吏司案呈奉本部送兵科抄出據
昭武將軍楊 題前事一疏奉

旨覽卿奏親率官兵進勦海逆恢復海澄縣城可嘉着議
奏該部知道欽此除滿洲有功官兵應俟回京之日議
叙外查該將軍未經造冊送部此抄無咨議覆應行
該將軍將殺賊數目并在事各官有無事故職名履
歷詳造清冊送部之日再議至得獲船械米穀等項

國朝 卷之九
三
聽該督報明戶工二部可也等因呈堂奉批照咨送
司案呈到部擬合就行爲此合咨貴將軍煩爲查照
施行等因到將軍准此除移行各鎮營在事有功各
弁員一體欽遵知照外今准前因合就咨達爲此備
咨 貴部院請煩察照施行

康熙十九年五月二十五日

飛報克取咨兩院

爲飛報克取廈門等事本年五月二十二日准 兵
部咨開職方清吏司案呈奉本部送兵科抄出據照
武將軍楊 題前事一疏奉

旨覽卿奏會同滿漢官兵進勦海逆擊敗賊衆恢復廈門
具見調度有方將士奮勇可嘉在事有功人員着議叙
具奏兵部知道本內副都統訛寫都統着飭行欽此除
遵

旨飭行并滿洲有功官兵應俟回京之日議叙外查該將

軍未經造冊送部此抄無容議覆應行該將軍將殺賊數目并在事各官有無事故職名履歷詳造清冊送部之日再議可也等因呈堂奉批照咨送司案呈到部擬合就行爲此合咨貴將軍煩爲查照施行等因到將軍准此除移行各鎮營一體欽遵知照外今准前因合就咨達爲此備咨 貴部院請煩察照施行

康熙十九年五月二十五日

題報勦殺咨督院

爲題報勦殺海逆克取東石地方事准 貴部院咨

開奉

康親王諭准 兵部咨前事等因到本親王准此行諭到本部院敬此合就移咨請煩察照 部文內事理希卽轉行標營將當日克取東石地方在事官員殺賊功次查造履歷清冊一様二本移覆本部院以憑咨 部議叙施行等因到將軍准此隨卽檄行本標中軍叅將馬勝轉移前後二營將當日克取東石在

事有功人員查明履歷造報去後今據該將造繳本標前後二營遊擊焦國巡劉國興等履歷清冊前來合就咨送爲此備咨 貴部院請煩察照彙咨 內部議叙以鼓勞員施行

康熙十九年六月十七日

請掛糧餉咨督院

爲請掛糧餉月領接濟兵食事據中軍參將馬勝呈稱據左右前後營中軍守備金殿龍張洪宗陳應隆齊亮等呈稱竊照本標五營官兵應支糧餉中營坐派泉郡四營支給省運遵行在案今查本標康熙十九年分銀米前經中營中軍守備丁世芳赴省領運至六月分止源源接濟各兵均沾鴻慈茲秋季屆期兵食似難刻緩合行預具領狀請掛赴省支運但查呈掛領狀應同四柱數目冊一齊繳掛惟是本標現

今購買新馬陸續發營配騎所有起支草乾日期理應具詳批示且兼挑有守兵領馬者必當詳拔馬兵若守兵旣拔馬兵則溢額戰糧又當改降守兵似此呈詳收除勢必稽待時日窮兵勞戍望餉維殷今殿龍等公同預具秋季糧餉領狀先期請掛赴省支領以濟兵食俟後詳批收除歸一登卽撥造冊領呈送核掛掣回原領銷算如有長短盈縮應找應還日當清筭以重錢糧不致混透呈繳秋季分領狀到職等情據此該卑職查得左右前後四營餉銀糧米向應

赴省領運茲按月請支數冊因候新馬詳拔收除歸一方得造掛泉省隔遠秋季屆期各兵望餉懸切如准預先具領掛支隨後造冊銷算實爲接濟兵艱出自憲恩軫恤標營咸沾宿飽德澤矣茲據四營呈具領狀前來卑職查明蓋印現在理合呈請掛咨

督撫

兩院轉行布司糧道支給等情到將軍據此爲照本標五營官兵馬匹俸餉乾銀除中營按月在泉州府支領外左右前後四營應需餉銀例應司庫給發茲秋季屆期窮兵望餉如歲緣本標新購官馬爲數繁

多挑選配騎升降不一本將軍近以會閱邊界未及親加驗明未便批准八冊茲據該將呈送左右前後四營備具預借秋季分銀米領狀前來統祈 貴部院掛送發司照數給發以濟兵食所有冊領俟本將軍回泉之日將配騎馬匹兵丁再行試驗批准八冊着令各營攢造冊領挂號補送撤回借領可也今據前情合就咨送爲此備咨 貴部院請煩察照惟祈掛送 撫部院發司照數給發以濟兵食仍祈示覆施行

康熙十九年七月十四日

借領月餉咨督院

爲呈請借領月餉事據援勦左右二營遊擊馬四玉
楊懋紱等呈稱據中軍守備楊可能等呈稱切照本
營官兵入閩援勦業荷各憲天威已平海逆今駐扎
泉州物價騰貴各兵應支月餉相應預期請領庶得
接濟軍需所有應支本年七八月分俸餉該軍職等
查照現在官兵數目備具借領呈送現在合無呈請
差員前赴本將軍軍前投遞領文赴司支領以資給
散俟月終扣定實支數目備造冊領呈送掛發掣回

借領等情到職等據此該卑職等出具領狀專差于
總鄧應魁前赴本將軍軍前領文支給外理合呈請
等情到將軍據此爲照援勦左右二營官兵應支七
八月分餉銀因泉州百物騰貴且現在收拾候

旨各回原營是以各兵望餉如歲茲據二營將弁備具借
支七八兩月分餉銀領狀各二張專員齎送前來所
有冊領候月終扣定實數照例備造核掛移送撤回
借領等情合就咨送爲此備咨 貴部院請煩察照
俯恤兵艱核咨 撫部院掛發藩司照數給發以接
兵食施行

康熙十九年七月十八日

飛報恢復咨兵部

爲飛報恢復海澄縣城等事本年五月二十二日准
本部咨開職方清吏司案呈奉本部送兵科抄出據
昭武將軍楊 題前事一疏奉

旨覽卿奏親率官兵進勦海逆恢復海澄縣城可嘉着議
奏該部知道欽此除滿洲有功官兵應俟回京之日議
叙外查該將軍未經造冊送部此抄無庸議覆應行
該將軍將殺賊數日并在事各官有無事故職名履
歷詳造清冊送部之日再議至得獲船械米穀等項

聽該督報明戶工二部可也等因呈堂奉批照咨送
司案呈到部擬合就行爲此合咨貴將軍煩爲查照
施行等因到將軍准此隨即移行准據各標鎮營將
十九年二月二十三日恢復海澄縣城在事有功人
員開造履歷功冊前來惟查此案本將軍統師恢復
海澄之時因急於具疏

題報以紓

皇上南顧所有當日在事有功各官職名俱未叙入原疏
今准

本部行令詳造清冊送部之日再議等因理合逐一
核明各官職名并傷亡官兵員名陣斃馬匹及零星
得獲器械數目備造履歷功績清冊又查准 本部
咨內開至得獲船械米穀等項該督報明戶工二部
等因除卽移咨 總督部院姚 報明 戶工二部去
後再查當日恢復海澄原將水陸官兵分作三路進
攻至於二路有功弁員應聽 總督部院姚 查明
彙冊咨送 本部議叙外今將各標鎮營大小將弁
跟隨本將軍一路進攻在事有功人員履歷彙造清

冊合就咨送爲此備咨 本部請祈察照俯念邊疆
血戰勞員議叙

題覆以示鼓勵施行

康熙十九年八月二十七日

飛報克取咨兵部

爲飛報克取廈門等事本年五月二十二日准 本
部咨開職方清吏司案呈奉本部送兵科抄出據昭
武將軍楊 題前事一疏奉

旨覽卿奏會同滿漢官兵進勦海逆擊敗賊衆恢復廈門
具見調度有方將士奮勇可嘉在事有功人員着議叙
具奏兵部知道本內副都統訛寫都統着飭行欽此除
遵

旨飭行并滿洲有功官兵應俟回京之日議叙外查該將

軍未經造冊送部此抄無容議覆應行該將軍將殺賊數目并在事各官有無事故職名履歷詳造清冊送部之日再議可也等因呈堂奉批照咨送司案呈到部擬合就行爲此合咨貴將軍煩爲查照施行等因到將軍准此隨經移行准據各標鎮營將十九年二月二十七日亥時攻克廈門逆島在事有功人員開造履歷功冊前來但查此案本將軍統師進取廈門之時因急於具疏

題報以紓

皇上南顧所有當日在事有功各官職名俱未叙入原疏今准 本部行令詳造清冊送部之日再議等因理合核明各官職名并傷亡官兵員名得獲器械數目備造履歷功績清冊至當日攻取廈門原訂期從海澄松嶼灣尾三路進兵一齊追擊逆賊聚船迎敵我兵大砲擊破打沉賊船共一十一隻斬殺淹死逆賊在海洋之中實難千百計數合再聲明惟是積年逆穴一旦蕩平此皆上邀

朝廷洪福下賴各將士戮力用命鼓勇齊進著有血戰勞

績實難泯沒除將從松嶼潯尾二路有功弁員應聽

總督 部院 姚 吳 查明彙冊各自咨送議叙外今將各

標鎮營大小將弁跟隨本將軍從海澄一路配坐船

隻進攻在事有功人員職名履歷彙造清冊現在合

就咨送為此備咨 本部請祈察照俯念勞員議叙

題覆以示鼓勵施行

康熙十九年八月二十七日

飛報大捷咨督院

為飛報大捷事案准 貴部院咨開准 兵部咨前

事內開奉

覽卿奏進剿海逆斬殺甚多攻破賊寨一十九處得獲

船隻器械等項具見調度有方將士奮勇可嘉在事有

功人員着議叙具奏該部知道欽此移咨到部院准此

合咨察照希將攻破十九寨一案當日在事有功各

官職名履歷并殺賊數目得獲船隻器械等項轉行

各鎮協營逐一詳造清冊移送以便彙送議叙施行

等因到將軍准此隨即移行准據各鎮營今將連破一十九寨在事有功人員職名開造履歷清冊前來合就咨送爲此備咨 貴部院請煩察照查核彙叙文冊咨送 兵部議叙以鼓邊海勞員施行

康熙十九年八月二十七日

請 旨事咨督院

爲請 旨事本年八月二十七日准 貴部院咨開

准 兵部咨前事內開通省量留防守應裁兵一萬九千九十五名亦應照題裁去見今老弱不堪者查裁五千其餘應裁之兵將老弱陸續裁汰逃故之缺停其頂補以定應裁之數至總督提督巡撫總兵官標下准爲馬二步八此所裁官兵並分守地方等事聽該督等公同詳定具題可也等因康熙十九年八月初一日題本月初四日奉

旨依議欽此移咨到部院准此擬合就移爲此合咨貴將
軍請煩查照欽遵將所減官兵并分防地方酌定會
題施行等因到本將軍准此爲照閩省陸路各標營官
兵旣經侍郎溫 疏開八萬一千七百四十五名量
留舊制兵馬應裁兵一萬九千九十五名 部覆奉
旨依議移咨前來自當遵照裁留查閩省陸路現兵只共
七萬七千六百四十五名除多開兵四千一百名另
文咨詢外今卽照八萬一千七百四十五名之數裁
留除裁去一萬九千九十五名實應留兵六萬二千

六百五十名除現在 督撫提鎮并 題准新舊各
營已有額兵六萬零八百五十名尙應撥兵一千八
百名添足議留經制六萬二千六百五十名額數此
所撥添一千八百名之內應將一千名補還通省各
營原調入桐山營兵額更餘兵八百名或應於裁營
守備之內撥出二員內一員帶兵四百名防守大盈
兼轄康店一員帶兵四百名防守小盈兼轄沙溪青
石宮一帶如此則邊海孔道可以鞏固無虞矣此議
留之兵額也其應裁兵一萬九千九十五名查 貴

標裁兵七千六百九十五名撫標一千五百名本標
援剿左右二營一千七百名續增具 題未准之灌
口一千大小盈一千五百馬口九龍嶺八百興化一
千泉州一千楓亭六百共只有兵一萬六千七百九
十五名內再撥出一千八百名添足議留六萬二千
六百五十名外實只存應裁額兵一萬四千九百九
十五名尚缺少裁額四千一百名不知此項額兵原
係何營之數本將軍無憑查考今卽就此現存一萬
四千九百九十五名清筭內除援剿二營一千七百
名發回江南又本將軍原調山東河南兵丁三千名
入閩補伍今現候

旨發回原營但各兵自入閩以來逃亡事故之外今實在
只有二千一百餘名應照數撥出二千一百餘名補
入本標以足原額再於現兵之內查將老弱沙汰五
千名以符 部議尙剩應裁兵六千一百餘名統候
貴部院宏裁酌委將弁帶領分防縣汛俟通省各標
協營陸續查汰老弱并逃故缺出卽於此存剩裁兵
之內分發補伍此開發裁兵之大畧也其無額四千

一百名之數惟祈 貴部院查明果係何項兵丁於
疏內聲明 題覆可耳至於分防地方除沿邊寨汛
先經各營原安有兵防守無庸更議其近准 部文
所開浯嶼圍頭永寧日湖獺窟平海烽火門七處內
浯嶼烽火門二汛查係海中島嶼陸兵難以飛越應
聽水師專防其圍頭應令駐防東石原江東左營遊
擊鄭興派兵分防永寧擬調雲霄營增設守備帶領
增設原兵五百名防守日湖就近看令泉州城守酌
量撥兵瞭探巡防獺窟着令洛陽營守備領兵四百
名分防平海擬調漳浦營增設守備帶領增設原兵
五百名防守已經另文咨覆外其江東橋副將詹六
奇應遵照 部議留駐銅山所有左右二營官兵應
將右營官兵一千名留防江東原汛其左營官兵一
千名應調赴東石地方駐防內派兵四百名分顧圍
頭尚有裁剩兵丁六千一百餘名俟通省各營缺額
撥補尚需時日或應分派於各處暫爲防守統候
碩畫之酌定也今准 大咨見詢合抒末議備覆爲
此備咨 貴部院請煩察照酌奪主稿 題覆并祈

示覆施行

康熙十九年閏八月初三日

邊海要島咨督院

為邊海要島等事八月二十七日准 貴部院咨開

准 兵部咨前事等因到部院准此合咨察照酌議

示覆以憑會 題施行等因到將軍准此為照浯嶼

圍頭永寧日湖獺窟平海烽火門七處侍郎温 原

疏題令陸兵水師酌調共相防守內查浯嶼烽火門

二汛乃係海中島嶼巡防勢需船隻方克有濟在陸

營官兵既無舟楫難以飛渡應聽水師專防似不必

撥發陸兵協防外如圍頭一汛與東石形勢毗連本

將軍近經咨請 貴部院將江東橋左營遊擊鄭興
調令帶領該營官兵駐防東石在案今應就遊擊鄭
興所帶防守東石官兵之內令撥出四百名分防圍
頭彼此互相聲援甚爲妥協其永寧一汛擬調雲霄
營新增守備賴益桐帶領增設兵丁五百名駐守日
湖擬令泉州城守營撥兵汛防查該汛咫尺汪洋大
海與內地隔離頗遠若多派官兵出防便當建築寨
城又多費一番民力惟着令該營酌量撥兵瞭探巡
防可耳至於獺窟一汛查與洛陽營形勢相連本年
五月二十一日爲移會事一案經本將軍咨議着令
洛陽營守備帶兵出防獺窟等因在案今似應照舊
議行令該營或守備或千總一員帶目兵二百名前
往該汛防守遇有警息該營將官率兵聲援其平海
乃興化府所轄應就興化撥兵出防但查興化鎮標
三營內中左二營係屬水師右營官兵一千名分守
沿邊錦墩後架白沙一帶尚恐兵力不敷實難再撥
城守一營除守城分汛并撥防仙遊之外亦無多餘
之兵今當調令漳浦營增設守備侯世裔帶領所增

兵丁五百名前往防守此陸兵派防事宜管見末議
是否有當惟祈碩畫酌定也若屢金銅山海壇等處
水師總兵各員以某人鎮守某處此屬水師機宜諒
貴部院宏謨遠畧早有定見或移咨 水師提督萬
再爲少加酌妥分布鎮守 題覆可也今准前因合
就咨覆爲此備咨 貴部院請煩察照酌奪主稿
題覆仍祈示覆施行

康熙十九年閏八月初四日

嚴查私藏咨撫院

爲嚴查私藏鎗炮火器以銷造亂之具事本月初七
日准 貴部院咨開將各地方凡民間所藏鎗炮火
器盡行查出收之入官有不自首送者予以重罰卽
有奸徒揭竿亦易於撲滅矧現奉

上諭嚴禁民間私鑄火砲尤當速行窮搜合亟咨商若何
而使藏匿盡除又不滋擾必有良法可措施行再弓
箭一項亦非小民所宜藏蓄似應一併查收庶源流
並絕或足爲銷亂未萌之萬一也是否可行均祈酌

奪示覆等因到將軍准此爲照閩省自遭變亂之後
往往易動難靜總因百姓或被脅從而習兵革或衛
身家而其利器遠近皆然耳目旣經習熟一遇不逞
之徒乘勢竊發卽蟻聚以拒官兵每藉砲火器械爲
鳴張之具 貴部院明鑑遠徹欲查追民間火器弓
箭以銷亂於未萌仰見鴻謨遠畧先事綢繆之善策
本將軍惟有敬服良籌欣承教益自當檄行各協營
將軍會同各府縣協查追繳以絕亂源第恐弁兵粗
悍與閩民之才黠未必相能一旦奉令下鄉追查軍

器勢必沿門挨戶盤詰倘奉行不善定滋紛擾若一
兵民爭訐不惟有拂 貴部院銷亂之美意并恐有
負 貴部院愛民之盛心以愚見所及凡屬城汛附
近地方則令營弁協同有司查追若窺遠鄉村及深
山窮谷似應專責各府縣督察或撥令賢能首領前
往挨查旣查之後卽取里保家甲甘結存案如有隱
匿軍器不繳者事發之日本犯按法重處該里保家
甲一併連坐如此庶人知儆畏不敢扶同隱藏矣其
沿海一帶地方無非隸屬有司者亦各令其查追尤

爲妥便統藉 貴部院之酌裁也至於嚴禁鐵匠人等不許私行打造砲火交排鎗等項軍器更爲端本澄源之先務惟祈 貴部院咨會 總督部院嚴行各府州縣村庄市鎮嚴加禁諭本將軍亦當出示嚴戢但立法旣善尤藉奉行者具有實心此尤祈 貴部院檄行各該道府廳縣加意舉行實心督察斷不至於違悖懈弛則民間之兵器自銷而海疆永無後患矣今准前因合就咨覆爲此備咨 貴部院請煩 察照施行

康熙十九年閏八月十一日

嚴飭巡拿咨

兩院水提

為嚴飭巡拿違禁船隻以杜勾通透越以安地方事

本月二十四日據福清營遊擊李應龍詳稱康熙十

九年閏八月十六日奉本將軍憲票內開照得沿邊

界限業准 部文奉

旨不准開復本將軍已經通行欽遵在案在各該協營將

領自當顧惜身名飭行防邊弁目稟遵

功令大破情面於各該轄汛港汊要口加意嚴謹稽察巡

邏凡遇有篷船隻進港俱當逐一細加查詢如無印

信牌票爲憑卽當連人船擒解沿海旣無友船則奸民雖有通天機巧從何飛越大海勾通逆孽如水師提督萬 近在浚後地方擒獲賊船一隻訊據賊夥供稱有奸民許開洪興魯子六張文興等前去勾通等情已經 水師提督萬 據供 題報不日 督部院與本官下在專汛弁員難逃處分是其自取在 將軍俱有責任若沿海向無賊船游移則奸民何從線索乃近訪聞各將領非因循玩忽則瞻徇情面不復顧畏

功令凡所轄各要口篷桅舟楫羣屯以採捕魚蝦爲名紛紛停泊賢奸莫辨以致奸民走險勾通疎防蔑法莫此爲甚合行嚴飭爲此票仰該將照依事理卽便嚴飭防守沿邊各要口弁兵嗣後除係無篷無桅原係內港採捕魚蝦平底小艇許聽從民便外如遇有篷桅船隻進港務要嚴加詢詰徹底查明若果奉有水師提督萬 印信牌票差遣出哨剿賊者方許停泊若無印信牌票及裝載貨物私行買賣者不論何項船隻俱要連人船盡數擒解通詳候奪該將仍不

時卑騎巡察以防弁目通同情弊不得仍前因循瞻
徇聽其出入無忌致滋勾通透越一經訪聞除弁目
立行鎖拏重處斥革外立將該將飛章叅處斯時功
名既墮身家俱失勿謂本將軍不諄諄申飭也仍將
遵依緣由報查更訪聞有種奸民假充營兵佩刀持
械背帶違禁貨物以巡哨爲名公然出入而守口不
肯弁目互相容隱不行攔阻等弊務要一并嚴行查
究毋違速速等因到職奉此該卑職遵卽嚴行所屬
汛守弁目一體遵照備具遵由回報仍卽出示曉諭
盤查外但查海口牛宅一帶疊有篷桅船隻進港或
稱脩葺篷桅或稱看家買菜及避風等情船內亦有
裝載魚貨者卑職向令該汛弁目嚴加盤查據報各
有照票抄到查驗或係水師或係聯絡率皆自刊私
記並無欵給印信且多干把末弁所給甚有不服盤
查者今沿海邊界奉

旨不准開復照舊嚴禁則地方汛守責任匪輕倘各營船
隻仍前只執私記照身出入爲憑旣難辨其真僞設
若奸宄假冒出沒爲患不小自應遵照憲令擒拏詳

報以杜奸弊但水陸勢阻恐有一二強悍抗拒所當
籲請憲裁咨會 水師提督通行水師各官及聯絡
等營凡有奉差出哨必請 提鎮印信牌票如遇進
港停泊務聽該汛官兵盤驗不許仍前自給私票不
服盤查其絕影冒庶透越勾通之弊可以永杜矣更
如島民奉

旨准其仍住耕種而海壇江陰等島居民及汛守兵丁遇
有進入內地似應在該島汛守鎮營給與印信照據
以便稽察以防詐僞踰越亦防範之一端也卑職未
敢擅便合併詳請憲示庶便遵行爲此備由具呈伏
乞照詳施行等情到本將軍據此爲照海逆遠竄臺
灣道誅海外若內地果無勾通斷絕接濟則釜底游
寇自當消滅所以

廟堂建議不准開邊嚴加巡緝以杜透越本將軍凜奉
嚴旨屢經移行各鎮協營嚴飭沿邊將士加意稽察如有
違禁船隻卽行擒拏以遵

功令各去後茲據該將詳稱福清海口牛宅一帶叠有篷
桅船隻進港船內裝載魚貨查驗照票並無水師鎮

營

欽頒印信悉係營中千把末弁私刊條記何足取信甚至
恃強不服盤查既難別其真偽設有奸宄假冒出入
致悞邊防誠非淺鮮今據前情合就咨達為此備咨
貴部院請煩察照祈卽

移咨水師提督

通行水師各

官及聯絡等營嗣後凡有奉差出哨等船必請水
師提鎮印信牌票進港停泊務聽陸汛官兵查驗以
絕假冒勾通之弊至於海壇江陰等島居民及汛守
兵丁進入內地亦應呈請該汛鎮營給與印照庶便
稽察則邊界肅清而勾通永絕矣仍祈示覆以便行
營遵照施行

康熙十九年閏八月二十七日

嚴查私藏咨撫院

爲嚴查私藏鎗砲以銷造亂之具事本年閏八月二十七日准 貴部院咨開爲照清查民間軍器一事茲准貴將軍咨覆內開嚴行各府州縣村庄市鎮嚴加禁諭等因深見 卓識宏裁本部院循照 大咨除沿海一帶移會 水師提督委員清查外但此舉務期必盡獲藏匿之兇器若作尋常通行終不緊切可否將八府一州地方分畫嚴查如漳汀邵三府則藉 總督部院嚴督該道府行查泉州府竟藉貴將

軍嚴飭營汛及地方官行查福延建三府本部院嚴
督該道府行查興化府則藉興鎮飭該營汛及地方
官嚴查福寧州則藉福寧鎮飭該營汛及地方官嚴
查如此責成稽察耳目易周各官當不敢以泛常相
視至應作何指授方畧使藏器者終不敢匿復萬萬
不至擾民生事併限以期日搜查完報尙祈碩畫指
示應再咨商爲此合咨貴將軍請煩查照示覆施行
等因到將軍准此爲照查追民間鎗砲乃銷亂之良
籌茲准 大咨分畫督查本將軍自當祇遵飭行各
縣營實心奉行至欲使藏器者終不敢匿復萬萬不
致擾民并限期日搜查完報等因查民間私蓄軍器
內惟砲火交排鎗鹿銃等項最爲利害在官府何由
備知在里甲鄰右平時無不熟悉今遣官親往追繳
惟責成里甲鄰右互相舉報取具不扶遺隱甘結存
案具結之後若有一家藏匿事發之日除本犯嚴加
究處外里甲鄰右一併連坐 貴部院仍先行大張
告示使村庄里甲家諭戶曉則小民畏法似可無敢
藏匿矣如欲不至擾民務在嚴行道府選委廳縣佐

貳才能素著之員量帶從役逐鄉逐甲加意挨查如有借公行私需索擾民或被告發或經 貴部院訪聞役則按律究處官則照貪吏指叅諒地方各官當稟遵

功令必自愛畏亦不至於滋擾矣若限期報竣似應論縣分之大小地方之衝僻繁簡酌定限期督令查報迨報竣之後 貴部院再加體訪如某邑某員果能實心奉行搜查淨盡卽以才能獎薦如泛視不力查追不盡一有發覺卽以闕茸叅處寓激勸於查追之中

知 貴部院自有鼓舞妙用又不待本將軍之贅言也然本將軍更有請者民間既無軍器又恐有不軌之徒潛匿軍器於深山窮谷知里巷無備禦之具恣行劫掠如別項軍器尚可防範倘藏砲火交排鹿銃等件其害尤烈必作何區畫使深山窮谷皆無匿器交排鹿銃悉盡追銷一有藏匿遺漏事發之日如何從重處分庶銷器與弭盜兩無遺策然後以清查保甲之法兼而行之則永久可以無虞此雖本將軍之過慮統惟 貴部院詳謨碩畫斟酌盡善者也是否

有當總聽 鴻裁緣准咨詢敢竭芻蕘今准前因合
再咨覆為此備咨 貴部院請煩查照仍祈示覆施
行

康熙十九年九月初五日

咨請酌給咨兩院

為咨請酌給硝磺火藥以安重地事為照泉州一郡
乃邊海要區上為興化省城之聲援下為同安漳州
之脈絡在泉之備禦既嚴庶上下之氣勢皆壯雖目
下逆孽遠邁但根萌未絕防範之策似宜周密查泉
庫現在硝磺火藥為數寥寥似此邊疆重地咫尺汪
洋大海萬一逆寇伺隙狡焉深入則攻擊之具非硝
磺火藥不足以殲敵制勝若臨時赴省請領往返數
百里能不耽延時日所關地方軍機尤非小可當及

今請發火藥五萬觔礮一萬五千觔焰硝五萬觔或
交泉州府縣官吏收貯或發泉州城守營將弁着令
修築高曠房屋爲局用心收貯看管以備緩急歲時
差員檢查似無礙冒破侵蝕在無事之時旣可與省
局官役分任收管之勞有事又可應倉卒殺賊之用
且可以備興化同安之接濟而城汛之氣勢人心亦
可藉以雄壯事有似緩而實急者此類是也相應咨
請爲此備咨 貴部院請煩察照酌奪示覆以便轉
行遵照具領請給施行

康熙十九年九月十三日

咨督兩院

爲修葺城垣鼓樓疏通街衢水道以固金湯以興文
運事爲照泉州一郡上連福興下接漳州爲閩省下
游適中要區逼臨濱海根本重地自變亂之後繼以
海逆竊踞殘破已極其城垣崩塌樓堞傾圮不特非
復昔時雄觀甚至通衢水道淤泥積穢居民住址悉
在水鄉以致民生日益凋敝文運因之不興茲仰邀
朝廷洪福 貴部院訂謨逆寇敗逃山海肅清所當及時
修葺以復舊觀以開太平之象本將軍自班師回泉

查閱城垣見城樓堞堞傾圮不堪併見郡內頽垣廢址街衢溝道併城濠堆積馬糞壅塞不通一逢天雨軍民居住水鄉觸目荒涼大非漸復太平景况隨經照會興泉道劄付泉州府於閏八月初十日會集通城紳衿耆老里民於府學明倫堂公同會議修葺用固金湯查城中東西南北四處鼓樓俱關風水除南鼓樓爲泉州第一緊要本將軍現在捐俸僱匠重新包葢外其餘各項所需工匠費用頗多而各紳衿士民耆老咸爲久遠之計欣然僉議願就泉州七縣產米之內每石暫議輸銀一錢三分共計銀六千九百餘兩倘不足用則本將軍暨道府廳縣各員以及通郡縉紳舉監學校共相捐輸以勸盛事此皆通郡士民歡欣踴躍以衆擎易舉情願樂爲原非別項私派者比本將軍親臨會議細察輿情委非勉強承認通郡士民周知茲因前議久未舉行催准興泉道回稱據該府詳奉布政司批有捐輸出之民米未免涉於私派等語且又未奉 貴部院批示故爾耽延等緣由查修葺城垣敵樓以固金湯以鞏根本而街衢鼓

樓及郡內城濠八卦溝水道舊蹟實爲泉郡風水命脈所關若在其頽塌傾圮壅積不通則民生疾病災沴頻見旣官斯土凡修廢舉墜振起作興實屬分內且係士民公議樂輸似當及時舉行以壯雄觀以培命脈者也本將軍雖荷

聖恩回任江南束裝在邇然與貴部院共事三載旣得海疆平定凡有裨益民生利濟地方之事在此一日自不忍一日置諸膜外在貴部院鞏固封疆振興文運愛養殘黎無所不至尤祈鑒此輿情加意作興迅賜批示舉行使泉郡重地煥然改觀則士民荷沐撫綏之德更無旣矣合就咨達爲此備咨貴部院請煩察照檄行興泉道作速舉行以固根本以復舊制仍祈示覆施行

康熙十九年十月二十四日

稟報事咨漳浦鎮

爲稟報事本月二十五日准 貴鎮咨開十月十六

日有賊船二十三隻灣在白沙灣地名小鎮海合就

咨報等因到本將軍准此爲照逆賊敗竄臺灣道誅

海外今復聚鯨至二十三隻竟灣白沙灣小鎮海港

岸似此橫行無忌奸謀叵測案據水陸各鎮營咨報

賊艘游移緣由俱經本將軍移咨 督撫部院迅移

水師提督速發舟師亟行驅剿在案今准前因除再

咨會 督撫部院咨催水師官兵迅行追剿外合移

飭防爲此合咨 貴鎮煩爲查照希卽檄行所屬沿邊守汛官兵廣行瞭探整棚隄備若有侵近內港卽行攻擊如遇水師官兵追剿各該汛卽遙爲聲援策應務殲逆氛以固邊防仍嚴飭各將弁時加巡察不許內地奸民私通接濟毋得稍有疎畧致干功令仍將嚴飭過緣由見覆施行

康熙十九年十月二十八日

密報事咨督院

爲密報事本月初九日據泉州城守叅將傅成呈稱案奉憲行近因沙汰投誠兵丁無家可歸嘯聚深山互相煽誘希圖不軌若不及時躡探剿捕漸成滋漫貽害地方所關非小仰職卽刻選差能幹兵役扮作鄉民分頭前往所屬各處密行躡探嘯聚賊黨約有若干賊首是何姓名現今巢穴何處限五日內密報前來以憑勦捕以杜亂萌等因奉此該卑職隨密差日兵扮作鄉民四處偵探去後今於十二月初八日

據差兵王桂等緝到偽總兵吳勝一員偽綾劄一張
圖書一方併陳福一名到職詢據吳勝供稱小的本
名陳公舉住南安二十都有家眷先在海上做千總
十七年投誠 撫院衙門給有千總劄付名係陳四
劄付昨晚燒了小的專用籐牌一切人馬都不怕還
會用排鎗小的是七月往省同五個人是我的真一
個謝萬是司理地方人一個林子是我的小廝一個
草箕住永春縣一個進仔住洪賴街一個張贊明住
南安二十一都土名王斗有家眷我先投誠時他們
曉得我能幹我在省城做生理十月間上去連江縣
路上撞着林日向就邀我永福營盤山上草寮說生
理難做給我總兵劄付林日向是管四省三十八府
節度使住永福用的是金印林日向就擺酒飯請我
跟林日向的人有五六十來往通報有三四匹馬
扮作我們衣帽行走我在那裏住五天林日向并他
的人日間東走西走夜間山上草寮議事旗號還沒
有說目下就到我就回來到興化住三天仙遊住五
天白鶴嶺住一天又到興化住二天永春住三天回

家招有四五十個兵若一傳他就來大小官多不曉
得名字人都認得南安九十都十四都人甚多我轄
下千總是李興住南安十六都還有一個總兵歐用
果住南安司裏土名謝山頭有家口有身家的他的
本家宗族多又一個總兵呂寬娘住土名謝山頭有
家口有身家的宗族多兩個總兵都有割付是親自
往永福地方林日向處領的泉州南安城裏都有受
割付的人拿到歐用果呂寬娘就曉得城中有割付
的人連江到省城一天到永福三天林日向下人有

三四萬說旗號一到就要動手了軍器有的林日向
有書差我到漳州女王處投女王姓鮑住烏丁壩離
漳州五天路女王係裹脚二十五六歲甚是能幹有
妖法有兵六千若有奸細打探他要銀子就有銀子
外人做的事他就會曉得女王留我喫飯說叫他旗
號快到分定營頭好在十二月半交春動手女王有
回書交我投送走到永春嶺頭菴撞見林日向人就
交付他去投我回來走到南安九十都平嶺頭又撞
見林日向的人齋劉國軒書又到女王處去投女王

的漢子是清朝殺了如今一路上都有人凡頭上帶的毡帽兩邊不剪開的有黃紬帶在腰間的都是記號有包頭布纏身的亦是他的人又有一個葉日高原是耿王下總兵嶺後一族是四省節度使在各處招的人多在永德十二都十四都來往走動不定等語又據吳勝下陳福供稱小的是廈門人今年十月從廈門上來吳勝家住在吳勝下人常差到司裏地方總兵呂寬娘家去因知吳勝在山作事故到他家又去廈門聞知吳勝有劄付到因此又從廈門上

來到吳勝家住了四天了等語理合解報聽候憲奪計呈解吳勝陳福等情到將軍據此爲照山海雖不猶恐伏莽未靖兼之沙汰投誠之衆無家可歸者復萌故智嘯聚深山遠谷之中互相煽誘貽害地方將來滋蔓實爲隱憂本將軍業經嚴行臬屬各營加意偵緝消弭於未然茲據該叅將將偽總兵吳勝等訊據口供尚有僞節度使林日向葉日高等多人與漳州之女王往來交通併結連海逆劉國軒謀爲不軌幸天敗其奸吳勝就獲所供夥黨亟宜緝捕以殄亂萌

除將吳勝等併綾劄圖書就近檄發泉防廳同叅將馬勝傅成副將朱起龍嚴審確實情形事干地方應審明咨請檄緝但恐事露宵遯一面選差幹員前往南安會同右司密拿葉日高等各夥黨外所有林日向偽女王等相應咨請 貴部院嚴檄道府作速密拿以靖根株俟泉防廳會審確實另備咨移令據前情合先咨達爲此合咨 貴部院請煩察照施行

康熙十九年十二月初十日

審報事咨吳部堂

爲審報事康熙二十年正月二十二日准 貴將軍部堂咨覆前事內開爲照投誠解散之衆應服未化欲逞奸謀幸賴貴將軍保障宏才密訪緝獲使反側之輩未得梟逞堪爲地方手額但事關重案理宜速結以安人心雖值貴將軍榮遷猶幸未卽就道其已獲之歐果卽歐用果等既覆詢情真証確仍應藉貴將軍斧斷速結以絕若輩覬覦其未獲之吳勝葉長等并打搶之林辰林細等亦希就近嚴檄該汛將

弁并移 總督部院嚴飭該地方道府會同火速躡
 緝庶無漏網如待本將軍部堂催緝及取詢口供中
 間駁查往返會商耽延恐未獲奸輩不無聞風兎脫
 致此案遂成葛藤矣今准前因合就咨覆為此合咨
 貴將軍煩為察照就近嚴檄速緝未獲以絕根株以
 安地方施行等因到將軍准此為照事關叛案理宜
 嚴行速結以安人心第緝獲叛犯營汛均有責成其
 研審真情妥招定案事在右司本將軍業經屢咨移
 會 督兩院檄行興泉道府轉行該廳縣將已獲各
 犯嚴加確審未獲各犯躡緝務獲在案茲准 大咨
 除復轉移行催速結外然本將軍交代在即不日起
 行其肅清奸宄以靖地方在 督兩院諒有同心自
 必嚴催迅鞫結案不致遲延使反側漏網今准前因
 合再咨覆為此備咨 貴將軍部堂請煩察照施行

康熙二十一年正月二十六日

平閩紀卷之十月錄

牌檄

檄守備余福

牌行建寧郭副將

牌委總理戎旗遊擊崔陞

檄遊擊晉淑玉等

檄叅將朱起龍等

檄副將田萬侯

檄守備趙士奇

牌行各協營

檄建寧營郭副將

檄偽副將蔡斌

檄遊擊韓六合

檄中軍馬總兵

檄隨征副將會榮

檄同安洛陽兩營

牌行蒜嶺守備田龍見

檄左營朱起龍

檄福州城守右營遊擊陳七

檄漳州城守江東灌口三營

檄左營遊擊朱起龍

檄建寧劉副將

檄遊擊焦國巡

檄泉州城守傅參將

檄副將朱起龍

檄副將朱起龍等

檄副將朱起龍

檄守備張有才趙勝

檄遊擊劉國興

檄行福清營遊擊李應龍

平閩紀卷之十

懋紹漁山

三韓楊 捷元凱著 男懋緒令鴻纂

懋綸今掌

牌檄

檄守備余福

為海寇乘潮突犯事據該備報稱本月初三日有賊大船百餘號海賊數千餘自邊崎由泥田乘潮登犯離縣十里許我兵分三股夾剿賊傷甚多淹歿莫計

今賊船尚在游移等情到本軍門據此照得賊船飄忽靡常乘潮登犯情或有之但查泥田係內地小港海寇所駕大船何以得連踪直入既稱我兵分三路夾剿爲時諒已許久潮水稍退大船卽當擱淺何不乘勢奮擊盡行剿殺又復聽其揚帆而去游移窺伺卽此類推則此報未免有虛張聲勢情弊且追殺賊寇務將的數呈報 部文久經通飭今僅以賊傷甚多淹歿莫計一語了局殊屬疎畧合并飭查爲此牌仰該備照依事理卽查前項賊寇當日果否俱乘大船侵入泥田我兵果否三路夾剿其殺歿若干淹歿又有若干因何不極力堵擊致賊大船復得從內地小港逸出在外洋游移逐一從實回報毋得隱飾致煩查出取咎未便速速

康熙十七年八月初六日

牌行建寧郭副將

爲特糾不職營弁以肅軍紀事照得本軍門蒞任伊始整飭維新今該營中軍守備郭成名不守官箴尅扣兵餉將銀十二兩私書一封串同該營字識林永秀夾帶進署希圖餽送本衙門書吏已經搜出銀書當發福州城守營黃副將究審供認在案除現在特疏

題叅外合就行知爲此牌仰該副將卽將郭成名收管在營其中軍守備事務暫於千總內擇選才守兼優

平定縣志 卷之十一
之員署理至代寄之林永秀卽行羈候併將發去原銀私書收貯在營聽候承問衙門弔審施行文到卽出具收管二紙併收明私書銀兩收領一紙具報查考施行

康熙十七年八月初八日

牌委總理戎旗遊擊崔陞

爲閩疆剿撫需材等事照得本軍門欽承

特簡提調福建全省軍務際此山海交訌馳剿孔亟必需材勇能員以資臂指查得標下隨征戎旗遊擊崔陞才猷素著技勇超羣且隨任有年勤勞茂著本軍門業經

題明隨帶從征遇缺補用奉

旨依議欽遵在案合行給牌以示鼓勵爲此牌仰本官照牌事理卽以遊擊職銜總理戎旗事務一切隨征官

丁及各局材官俱聽本官管理約束遇事則統率各員聽候指示隨宜防剿凡遇征戰務宜奮勇當先摧鋒克敵斬寇擒渠果能建立功績一遇相當員缺卽行特疏

題補實授本官受茲委任尤當益加勉勵以副本軍門拔擢至意毋得怠惰慢事有責任使慎之勉之

康熙十七年八月十二日

檄晉淑玉等

爲申明賞罰以鼓勇往事照得海逆狂逞圍困泉州本軍門統率官兵會合各路兵馬進剿諒此烏合之衆敗亡在指日間正將弁奮志立功之會兵丁乘時報効之秋但軍中賞罰務宜申明今本軍門設立賞格凡我叅遊都守千把等官暨百隊兵丁有能奮勇先登衝鋒陷陣擒斬賊魁扒城跳舟者俱照依賞格重加賞賚立卽特疏

題補現缺以昭鼓勵其有臨敵退縮進戰不力者定按

軍法從事立行梟斬除賞格粘單外擬合行知為此
 票仰該將照依事理即便加意勉力建立奇功本軍
 門會同 撫院定行頒賞特
 題以酬血戰功績倘或怯懦退縮臨陣不前軍法無私
 斷不姑貸仍遍傳千把百隊兵丁一體遵行以鼓勵
 往各宜奮力勉之勉之

康熙十七年八月二十日

檄叅將朱起龍等

為行查守城勞績事照得海逆狂逞攻圍泉城經兩
 越月所賴在城將士相機戰守協力同心獲保無虞
 今海賊敗逃所有當日宣力用命人員本軍門不忍
 泯沒卽當會疏

題叙以酬勞績以示鼓勵擬合就行查取為此票仰該
 將照依事理卽將當日在城固守宣力將弁勞績逐
 一查明彙造清冊呈報以憑核明會

題議叙毋得遺漏及冒開功次致煩駁查速速

康熙十七年九月初五日

檄副將田萬侯

爲飛報大勝事本月初九日據該協報稱官兵在官塘洋面剿殺海賊得勝緣由到本軍門據此照得海逆游移邊汎剽劫殘黎爲日已久罪惡貫盈茲官兵奉令追剿各皆奮勇用命大敗賊衆擒斬纍纍此皆該協調度有方本軍門閱報不禁欣躍除卽啓報

親王并移咨

督撫兩院俟事平會

題請敘外合行獎勵爲此牌仰該協照依事理卽便轉行在事各該將弁務宜益殫忠勤悉力追捕先清近

平之日定行會疏
島以剪逆焰之鴟張再奮遠敵以靖海疆之鯨浪事

題請優擢以酬勞績至於重傷官兵速卽發回調理不
必帶在船上恐失于醫治實切軫懷各毋違錯

康熙十七年九月十二日

檄守備趙士奇

爲會報招撫島民事本月二十四日據該備會同福
清縣呈稱於本月十四五等日躬詣界邊分委把總
楊彪典史駱應期并各弁員招撫到海壇江陰二島
難民周善等共二千三百七十五名口等情到本軍
門據此照得逆孽肆虐致室家完聚之赤子輸租供
賦之良民流離飄散慘被俘掠本軍門時切疚心今
招到難民如許具見該文武留心邊務加意民瘼除
該縣及各文職應聽 撫院旌獎外擬合就行爲此

崇仰該備照依事理仍卽轉行把總楊彪各准記獎勵一次該備仍會同該縣將招到人口善為安插編入里保家甲之內共相保全勿致失所可也毋違

康熙十七年九月二十六日

牌行各協營

為振舉激揚查取賢否以重彰獯事照得閩疆民困未甦寇虐未靖將弁有保衛地方輯睦兵民之責允藉賢能其裏底定本軍門自奉

特簡調補八閩未入境之先已訪聞大小各營將弁克自砥礪恪守官箴者固不乏人而貪黷擾民縱兵玩寇者亦殊不少總緣因循日久彰獯不公遂致賢能無由奮勵不肖得以姑容本軍門初解臬圍整飭營伍考核官評以定舉劾所有將弁賢否合行查取為此

牌仰該將協照依事理即將所轄各官慎加採訪其將某弁馭兵有術防勦有方給餉無虛兵民安輯其將廉訪明確矢公矢慎開載切實事蹟填註切實考語密速具呈以憑覆核賢能者特疏薦揚不肖者飛章叅處本軍門志在激揚實心振刷卽以該將協所呈賢否之虛實驗政令之從違定平素之優劣勿得徇私愛憎舉報不公致干未便

康熙十七年九月二十八日

檄建寧營郭副將

為會剿賊寇事九月二十七日據福寧鎮標左營守備阮照報稱本年九月十五日准防守壽寧縣建寧右營千總黃榮手本移開九月初十日本汛斜灘地方被山寇百餘劫擄殆盡隨即會同壽寧縣發兵征剿賊卽潛遁橫山村查此地方係貴汛界口奈兵寡賊衆猶恐難以克敵事干隣封寇犯合行移請官兵會剿以安地方移會到職等因准此卑職隨撥効用官陳有德吳君太帶領目兵一百名前往本營轄汛

界口畚頭地方屯劄聽候壽寧官兵訂期會剿為此
除一面徑報 福寧總鎮黃 併 督撫 兩院外理合

報明等情到本軍門據此照得山寇肆劫防兵自應
飛馳追捕以保衛地方今斜灘被寇劫擄殆盡守汛
官兵漫無剿獲縱寇殃民莫此為甚查壽寧縣係該
副將所轄汛地何以竟無隻字報聞殊屬疎忽今據
前情除嚴檄守備阮照速令官兵前往會剿外擬合
飭行爲此牌仰該協照依事理即便嚴飭壽寧防弁
務要親帶官兵前往斜灘橫山一帶地方會同福寧
左營官兵將前項山寇剿滅淨盡并不許騷擾地方
一草一木如敢藉口兵單偷安玩悞致賊眾滋蔓貽
害地方定行參處不貸慎之毋忽速速

康熙十七年九月二十九日

檄僞副將蔡斌

爲招撫投誠事照得邊海殘黎皆我赤子屢被逆寇蹂躪多有脅從下海逼授僞職以致難旋鄉井遂成水底游龜嗟此流亡深可憫惻本軍門仰體

朝廷浩蕩洪恩宣佈招徠業經通示沿海諸以自新今有僞親軍副總兵蔡斌等現駐日湖地方意欲歸誠殊堪嘉尚合行招撫爲此稟仰該副將照依事理即便剃髮率衆來歸官以原銜錄用兵則收標補伍其有願歸農者發回原籍善爲安插本軍門素以信義待

人毋得懷疑觀望有負招徠至意

康熙十七年十月初三日

檄遊擊韓六合

爲飛行追殺逆賊事本月初五日據該將報稱帶領官兵在於坑口一帶地方剿殺逆賊七百餘名等情到本軍門據此照得逆賊剽劫害民爲禍已久今三省會剿賊勢潰敗亟當乘此機會窮追搜捕以絕禍萌擬令就行爲此票仰該將照依事理務要督率弁目乘此破竹之勢速將前項賊寇剿捕淨盡毋令一賊兔脫以滋後患事平之日定行會疏題敘勉之毋忽

康熙十七年十月初九日

檄中軍馬總兵

爲呈請招撫巨寇以安民生事據該將呈稱漳協隨
征副將會榮與江機原有一面之識自願前往招撫
等情到本軍門據此照得逆賊江機嘯聚亡命流劫
害民致煩三省官兵會剿近屢准據各鎮將咨報斬
殺得勝現在進趕合關指日可以蕩滅等情在案但
帝德好生若進兵剿殺有傷天和既據該將呈請前情合
准招撫除咨商 將兩院選委賢能有司前往該地
方暫行安插一面查詢各僞兵情願歸農入伍分別

造冊呈報以便發回原籍并發營起支外爲此票仰
該將照依事理即便轉諭副將會榮用心前往招諭
務要宣布

皇仁開示禍福諭令江機并原營各僞將頭目作速帶兵
來歸定行會疏

題授原職照例給俸其副將會榮事竣之日一併另疏
題敘以酬勞績功名之會宜自勵勿違

康熙十七年十月二十一日

票檄隨征副將會榮

爲耑員招撫事照得

皇恩浩蕩宏開宥過之仁智士審時宜體

好生之德茲訪聞江機雖夙墮乎迷津今思反于覺路本

軍門祇奉

皇仁合行耑員招諭爲此票仰該將照依事理即便前往

江機營中宣揚德意開示禍福令其率衆來歸本軍

門定行會同

督撫兩院特疏

題擢以嘉與維新其所轄官兵有願隨標効勞者給與

俸餉有願離伍歸農者卽爲安插得所斷不爽信該將務宜備悉陳諭以開迷途可也毋違

康熙十七年十月二十九日

檄同安洛陽兩營

爲稟報事本年二月二十八日據泉州蘇同知晉江營遊擊韓元朗報稱切照卑職等於本月二十一日抵同安縣緣同安城守左營遊擊王大奉督憲遣統官兵先抵王地山賊巢其賊首鄭奇烈卽鄭不伐聞卑職等帶兵自南安山內趨來因遣人赴同安總鎮馬處約降卑職等不便造次竟進隨請商總鎮馬馳詢王遊擊俟其回報以定進止於二十一日亥時王遊擊具稟總鎮馬云蒙督憲遣

來差官卽時進寨鄭奇烈排隊出迎王遊擊仍遣千
總楊明等齎督憲所發旗幟花紅銀牌入寨諭令
卽速下山等語候至二十三日午刻仍無下山的信
畢職等恐其游移且慮王遊擊駐兵在王地山其外
卽係亭溪橋海賊登岸之要道理宜扼守隨商同
安總鎮馬所見亦同畢職等遂於二十三日未時
移營亭溪橋一以防備海逆一以接應王遊擊仍遣
隨征叅將周隆等齎書開導鄭奇烈速其赴漳復於
本日密訪亭溪防兵據云鄭奇烈昨差二僞員往廈
門說接家眷來山竟未接來往來俱坐海上施亥舍
船隻其僞員係二十二日過此向我等云今晚海上
有船來要捨你們仔細是夜果有賊船三十餘隻登
岸人劫下店寨至今賊船尙泊岸口未去聞說鄭奇
烈原非真心投誠因寨內糧盡又聞你們官兵從山
裏出來方說投誠等語畢職等聞此熟思彼既遣員
約降多日海上豈不聞知往接家眷自是竊取何敢
如此張揚而海上竟任其往來其中必有詭謀况下
店賊船不退明屬藉撫脫圍接應歸海耳隨經密書

通知王遊擊再察虛實以便移兵會商兼詢其帶來官兵數目於二十四早王遊擊差人復書云鄭不伐只等人夫三百名即便起身不必移兵前來至其官兵數目屢囑開示未肯等語當卽料理催夫間至午刻據差去周隆等回稱齋書進寨再四開諭鄭奇烈察其舉動尙屬游移隨閱回書詞皆支飾就於此刻內遙見鄭奇烈山頂寨內火發早職等虞有變立時拔營進內至坑仔鄉地方遇王遊擊來兵云鄭奇烈竟不通知王將王忽自燒寨放炮掌號整隊從長泰山路而去王將王已帶官兵追去等語時已日暮早職等卽駐營坑仔鄉於二十五日午時准王遊擊移稱鄭總兵歸誠日索夫簞米石屢經稟請 總鎮馬弁馮協鎮設處應付而鄭總兵忽於二十四日午時掌號起營本府望見卽帶官兵星馳追至酉時到長泰林墩地方與鄭總兵連營今其意尙未欲行等候米夫祈卽迅發前來給其起行等語早職隨除行同安縣催備運送外而 督標隨征副將陳惠漢遊擊張輝亦從山內移營出來云王遊擊未令伊等前去

卑職等思鄭奇烈如果傾心効順何不開報官兵數目何不先繳軍器何不約會徑行如果尚需夫糧何不候於本寨而候於長泰之林燉旣至林燉何不直趨漳州又以候夫糧爲枝節且林燉地屬長泰去同安甚遠何不就近取夫糧於長泰種種可疑情實叵測卑職等初欲進兵碍於降議恐有驚疑阻撫之嫌繼欲會合又因王遊擊遣人回止今欲前追又慮其叛撫難定且如陳副將張遊擊在彼同劄之兵尙遣其回卑職等未便擅往除具報

督撫兩院并 寧海

將軍喇 外俟其再探真偽另報合將鄭奇烈回書抄呈一摺馳報等情到本將軍據此爲照逆賊鄭奇烈卽鄭不佞雖云遣人約降據報游移情狀似尙有懷二之心恐狡謀叵測緩我師期且據報內敘及安溪防兵所稱鄭奇烈差僞員前往廈門搬接家眷突有賊船三十餘隻登岸劫掠下店至今賊船尙滯岸口又不知會遊擊王大有忽自焚寨放炮整隊從長泰而去種種詭謀情實不測合亟飭行爲此稟仰該將照依事理趁此官兵會剿之勢一面會商行間各

將弁分兵佈置各要口絕其救援斷其糧道一面催給夫役速其造報投降官兵器械冊籍晝夜小心隄備如鄭不伐悔改前非的實輸誠則善爲接引如狡計緩兵情形彰露則合師夾擊該將身在行間務要相機剿撫不得稍有疎畧以致墮落賊計可也慎之毋忽

康熙十八年三月初一日

牌行蒜嶺守備田龍見

爲遵奉

俞旨安設官兵等事照得蒜嶺一汛緊近海濱最爲衝要孔道先經 題准安設守備一員兵四百名必得諳練能員方稱斯職是以本將軍以本官久歷邊汛技勇優長固守泉城著有勞績業經咨會 總督部院合疏具

題補用去後但要地需員料理合先委用爲此牌仰本官照依事理即便前赴蒜嶺地方任理守備事務招

募精壯兵丁設立營制酌量地方險易分防扼要其應設千把等官務選歷練營務有身家可以稱職者呈送驗補至所需砲火甲械軍器等項查明應用數目具文詳奪以憑咨請給發本官受茲委任尤須殫心料理戢盜安民其新遷界限嚴加稽察約束官兵以固邊防以疏大道俾往來錢糧商旅務保萬全毋得怠惰玩愒致負

題擢至意仍將到汛日期通報查考勉之毋忽

康熙十八年三月初一日

檄左營朱起龍

為行知事據晉江營署守備蔡斌條議兩欵前來本將軍閱之其言多有可採合亟行知為此牌仰該將即便傳該守備查照後開事宜面同細加商確如果有益即速舉行仍將行過緣由報查該將夙稱練達務要實力實心不得虛應故事有負委任勉之勉之

計開

第一款逆賊敢與我師對壘恃有泉屬一路之糧道蓋泉屬之外地雖遷而汛防未設界外之室廬雖燬

而出入罔禁試就安平靈水前埔竿頭等處界口論之數處皆東石出沒之咽喉深滬日湖賊藪之運道茲者採捕有禁矣而操舟入海者如故饋餉有禁矣而齎糧運輸者不絕魚鹽之利悉爲賊有閭閻之財盡充賊帑一種亡命遂藉此作奸或派夫鹽或擄殷戶或勒米石剃髮雖如編氓橫暴無非賊焰親戚庇之而不發鄉黨畏之而不斥無怪乎東石深滬之嘯聚爲泉郡之邊患也今請不時出兵瞭探或月兩次或月三次變化不測使賊不知虛實或遇颶風驟起則直搗賊船處所使在山派米者不得下海遊生而在船看守者不能躡舟渡載時出擒捕則賊必懼而不敢恣行窺探一可以奪賊黨之魄一可以塞勾派之漸

此一款該將須與該備細商作何遣撥精細能幹弁兵應於何時差出探聽擒捕如能拿獲真賊並勾派接濟奸民立即鄉解軍前審明梟示以儆其餘用命人員定行獎拔重賞

第二款東石之賊皆內地奸棍爲之乘此設防之日

編造保甲使之互相糾察凡甲內有從賊在海者令其自行舉首爲賊鄉導派米者聽其密行指報仍編造戶口冊十家一甲或某甲某人從賊則填註名下先使其父喚子兄喚弟妻勸夫叔勸姪自行招回免其罪愆五日不來則限十日十日不來則限半月半月不來然後究其親屬治其從逆之罪或有窩容不舉則按以連坐如此則賊黨日散羽翼日消矣

此一欵該將與該備細查賊黨最多之處勾派接濟要路逐一開出即便移會道府選委賢能廳縣該將仍便委勤慎守備一員量帶兵丁協同查緝保甲開諭居民使其互相覺察限日喚回如限外不歸立行拿解親屬并嚴飭去員不得生事取究

康熙十八年三月初五日

檄福州城守右營遊擊

爲稟報事本月初十日據該將報稱逆賊紀朝佐於
二月二十九日申時逃走雙翰練總蘇英隆堵守石
獅岐帶領鄉兵堵截逆賊不顧鎗砲衝出等情到本
將軍據此照得賊首紀朝佐因被官兵緊追勢窮力
竭故以投誠爲緩攻之計先據該將呈報就撫情形
業經本將軍飭行可招則招應剿則剿嚴加隄備在
案該將身在行間卽當細察情偽益嚴紀律申飭官
兵鄉勇協力攻圍絕其糧道扼其要口使彼窮蹙無

望則就撫就擒勝筭在我何得漫無定見一聞投誠之信便自疎防不加把守致將斃之賊復行奔逸因循玩寇貽悞軍機莫此爲甚今據前情合行嚴飭爲此牌仰該將照依事理卽便躡探逆賊紀朝佐現今逃往何方屯住何處務帶所轄官兵督同鄉練并知會晉江營遊擊韓元朗星夜窮追勿分界限期在擒滅此賊以贖前愆方准回師如再飾詞推諉偷安縱寇定行特疏糾叅斷不姑貸并查逆賊衝出逃走之時所往之處係何千把弁員帶兵扼守何以並不督兵堵捕只付鄉練蘇英隆把守致賊得以乘隙衝走更屬疎忽仰該將一并查明據實回報以憑提究各毋違悞火速

康熙十八年三月十三日

檄漳州城守江東灌口三營

爲嚴禁勾通以絕盜糧事照得沿海遷邊之後築墻
扼守原期堅壁清野以絕盜糧至于奸民之勾通接
濟屢經本將軍叮囑告誡營汛將弁嚴加防範不得
疎縱已不止三令五申若沿邊將弁果能凜畏

功令稽察嚴密則奸民自然屏跡而絕島逆孽自可坐致
飢餒乃近訪聞有等奸徒愍不畏死或倚藉本汛弁
兵叔姪子弟名色搬運米穀布帛出界換回魚貨動
至數十擔充塞道路公然貿易以致逆賊得延殘喘

此皆汎防官兵貪圖賄賂通同作弊縱奸養寇大干

法紀該

副將

有地方之責全不念及功名身命若知

而不拿則為狗縱若慢無覺察則係溺職現今逼處

賊壘而該

副將

猶如聾如瞶何以辭咎除經差員密

訪外擬合嚴行申飭為此稟仰該

副將

將照依事理即

便猛加省惕嚴飭所轄防邊各弁員洗心滌慮嚴加

巡察不得仍前疎縱前項弁兵子弟叔姪出界致令

奸宄勾通魚米出入無忌如有前項透越不論何項

人等立即擒拿解軍前即將所獲貨物給賞盤獲

之人該

副將

仍差親信人員於各口岸不時闕查務

要盡除前弊如防邊弁兵仍敢扶同作奸或奉行不

力不即擒解致被他汎盤獲者審明定將弁兵正法

該

副將

以知情故縱特疏叅處決不輕貸事關杜絕

勾通本將軍法在必行各宜凜遵毋自貽戚慎之慎

之

康熙十八年三月二十八日

檄左營遊擊朱起龍

爲飭查事照得大盈小盈一帶乃衝要孔道且逼近東石逆穴山海賊寇不時出沒其間是以遣發該將會同興泉道帶領官兵前赴該汛築寨設防該將受此重任自當作速催召人夫砌寨開河加謹隄備晝夜小心瞭探遇有警息督率官兵奮力剿殺以挫賊鋒以固邊界何以據報三月二十一日到汛經今半月有餘竟不催夫建築完竣致官兵棲止無地該將瞻徇情面任意稽延且訪聞四月初一日逆賊登

犯直冲該將營盤道路傳說紛紛而該將杳無一字
申報豈傳聞未確耶抑該將隱諱不報耶事關軍機
合行飭查爲此稟仰該將照依事理卽將本月初一
日賊寇登犯官兵對敵勝敗情形立刻據實飛報前
來以憑察奪其寨城濠溝務卽催取民夫開砌堅固
勒限完竣嗣後尤須晝夜小心勤慎加謹備禦不得
偷安怠玩致有失事大干未便愼之母忽速速

康熙十八年四月初七日

檄建寧劉副將

爲稟報事本月初八日據該副將報稱卑職前奉
撫院憲檄赴崇浦二汛調度業已齊集官兵惟俟借
給府餉立即前赴策應等情同日又據該副將報稱
已於三月二十二日親帶官兵自建起行馳赴崇安
堵剿隣寇各等情到本將軍據此照得建寧地連江
右際此隣寇竊發自當發兵堵剿惟是該郡城池當
全閩上游之衝現今該管官兵徵調四出存郡寥寥
無幾惟該副將與千總一員城守而已今若再行遠

出城池倉庫所在關係何等重大况刻下春水盛發河道泛溢依山附海之徒易於乘機窺伺而外省解閩協餉以及各衙門差奏不時經過尤須保護防禦務無疎虞今據前情除即移咨

督撫兩院酌妥外合

行知照爲此稟仰該副將照依事理即便仍回建寧固守城池倉庫其堵剿鄰寇事宜即轉行署事叅將李盛功知會施桑二總兵併休致總兵熊鼎魁督率官兵鄉勇合力夾擊殲滅鄰寇以靖地方不得稍有遲悞自干

功令本便慎之慎之速速

康熙十八年四月初九日

檄遊擊焦國巡

為咨明事據後營遊擊劉國興呈稱遵奉憲行令職
帶領官兵馳赴竿頭靈水等處一帶地方扼守知會
駐防大小盈叅將韓元朗互相犄角策應聲援卑職
敢不遵依但查竿頭地方南離靈水五十餘里北離
日湖三十餘里其間灣船之灣節節皆是賊踪時常
飄忽難與內地汎轄者比若遵照憲令兼轄靈水未
免地廣勢懸顧此失彼請乞再撥將官一員駐防聯
絡應援等情到本將軍據此案照先准 總督部院

咨商大小盈竿頭靈水前埔一帶緊要處所需兵防守故將省來并興化泉州所招兵丁一千六百名又調出安溪兵丁行令興泉道傳齊着晉江營遊擊韓元朗統領協防小盈竿頭去後總之大小盈等處須將官一員竿頭靈水前埔等處須將官一員方爲萬全等因業經本將軍檄行遊擊劉國興帶領官兵駐防竿頭一帶去後并經行令該將速將原防惠安官兵帶回泉州操練兵馬聽候調遣在案茲據遊擊劉國興呈稱竿頭靈水地廣勢懸誠恐猝遇警息鞭長莫及合行遵照爲此票仰該將照依事理除大小盈等處地方係叅將韓元朗現帶官兵駐防竿頭係遊擊劉國興帶兵扼守外該將卽將惠安帶回該營兵丁現有若干名并移知左營朱副將挑撥添足三百名該將火速帶赴靈水一帶地方扼防務要夙夜勤慎加意探防遇有警息知會叅將韓元朗遊擊劉國興星馳電擊互相策應以固邊防不得少有岐視因循疎忽致干

功令仍將到汛日期具報查考施行速速

康熙十八年四月十八日

檄泉州城守傅參將

爲稟報事本月二十四日據該將報稱有海賊紀朝
佐下營將蘇良帶兵八十餘人來五堡社安歇口稱
係官洋鄉武舉王興邦招撫投誠的等語又有僞鎮
楊尾黃高郎等帶兵三百餘人現在十六等都官園
鄉出示稱奉 院道牌招歸誠又紀賊將會光賜等
帶兵百餘人在鸚哥嶺任劄居民騷動又黃高郎戴
厝口稱蒙 撫院委官招撫投誠地方驚惶等情慮
恐賊計叵測難以聽信隨請明 寧海將軍喇 整

備官兵相機剿撫等情同日又據泉防廳報爲飛報賊情事內稱楊尾紀朝佐率夥五百餘猛來駐十六都等處藉稱受撫橫肆無忌攻寨殺戮人莫敢禦又要來高田寨報怨等情各到本將軍據此照得

朝廷招徠叛逆乃好生洪慈若輩旣云受撫自當卽刻投戈洗心歸化何得藉口投誠遷延各鄉依舊劫掠擾害鄉民該將有專城之寄責任綦重不得任其橫肆今據前情合行飭查爲此票仰該將照依事理卽便就近移會興泉道查照前項逆寇果否奉有

督撫兩院招撫之文若果差員招徠可卽速催率衆投戈進城以便安插若係假借就撫爲名希圖搶劫害民立即就近稟請 寧海將軍發兵剿捕毋得聽其狡詞藉撫騷擾殘黎貽害地方火速火速

康熙十八年四月二十七日

檄副將朱起龍

爲知照事照得大盈小盈以及前埔竿頭靈水俱係
邊海要汛且逼近東石逆穴際此南風盛發誠恐賊
艘窺伺隄備不可不嚴尤恐該將所帶兵單近經本
將軍咨商 總督部院已准咨覆行調邵武副將郭
奇帶領邵武延平二協兵丁一千餘名前來大盈前
埔一帶分布扼守不日即可抵汛合行知照爲此票
仰該將照依事理卽將大小盈併前埔靈水竿頭一
帶寨城作速催築完竣以便官兵扼守仍須晝夜嚴

督現帶官兵加謹隄備以防逆寇不突俟副將郭奇到汛之日商酌作何派防具支呈報以憑察奪俱毋違錯速速

康熙十八年四月二十七日

檄副將朱起龍等

爲稟報事本月二十五日准 興化鎮咨開本月十

五日辰時遣發興化城守營千總李先春帶兵星赴

仙遊縣追剿紀賊今據該弁報稱逆賊被我官兵追

逼逃避山窩當卽傳令各兵四處搜剿並無踪跡至

申刻據探兵鄭勝回稱逆賊尙有三百餘夥於十四

日晚乘夜奔入南安二十八都王巢寺地方等語據

此該先春查得王巢寺地方係南安安溪同安三縣

交界管轄離仙遊縣界有二百餘里彼處原有徑路

可通大盈小盈並半嶺同安各處先春慮及逆賊被
我兵追剿計窮或從彼處潛回下海或奔遁別處合
就稟報請乞檄行該縣官兵就本處可通海道要口
加謹堵截令其不致漏脫下海則逆賊斷無生路矣
先春因逆寇遠離境界越歷幾縣途遙未便輕進隨
將所帶目兵撤回於十五夜二更仍到營盤分布要
口守禦並差兵馳道密探外俟有情形另報等情前
來據此合亟咨報等因到本將軍准此爲照逆孽紀
朝佐被我官兵夾剿敗剝之後四處流竄據報奔入
南安二十八都王巢寺地方趁其晷奔之時亟宜搜
剿今准前因合亟飭行爲此牌行該將照依事理立
卽會同叅將傅成韓元朗卽便酌遣官兵會合鄉勇
堵絕要口協力夾攻務絕根株不得稍有因循懈弛
致令兔脫下海貽害未便速速

康熙十八年四月二十七日

檄副將朱起龍

爲飭查事照得閩省山海未靖剿禦需兵本將軍初蒞之日以本標伍營兵丁缺額過多召募一時難足兼恐土著脆弱不耐征戰所以

題調山東河南勁兵三千名入閩補額續因出師在漳鞭長莫及念泉州邊汛亟宜設防兼該將同興泉道到漳請兵故前委該將帶領山東河南官兵前往大小盈靈水竿頭一帶相度地勢分佈扼守謂該將必能仰體委任至意撫恤官兵固守邊汛近乃訪聞東

像新兵相率脫逃竟至三百餘名本將軍細查逃走
緣由方知各兵自回泉至今陸續只支銀五錢三次
共只關米一斗五升饑餓難忍求借無門故爾脫逃
該將受命委重任則地方官兵皆係該將之責成若
官兵缺乏糧餉便當早為催領以資日食如呼應不
靈尤須懇切具詳本將軍以憑移咨

督撫兩院檄發

何以漫不經心坐視楊腹致令相率脫逃殊屬玩愒
且本將軍訪聞東豫新兵共逃過三百餘名今查該
副將前後呈報除拿獲及殺回者共八十一名又未

獲在逃者止八十餘名其餘逃兵竟爾隱諱不報豈
傳聞之訛耶抑該將故為隱蔽耶相應一并飭查為
此牌仰該將照依事理即查本標伍營在泉官兵糧
餉已經給至何月分止現今有無懸欠若有役過未
給立刻懇切具支詳請以便移咨

督撫兩院早為給

發以濟兵食至於東豫兵丁前後脫逃數日務要徹
底清查現今實其在逃未獲通計若干分別山東河
南河標各營分備造花名清冊一樣各二本以憑移
咨 各省

督撫部院緝拿補伍不得仍前玩忽隱諱致

干叅處未便速速

康熙十八年四月二十八日

檄守備張有才趙勝

爲咨會事爲照小港洲地方緊與海洲馬洲寇壘對峙大港洲又逼近灣腰樹逆巢兩處最爲險要口岸逆賊乘潮游移放砲不時希圖侵犯所以不得逞志者緣原派漳州鎮標左營守備張有才帶兵防守小港洲守備趙勝帶兵防守大港洲與督標王都司營盤毗連所隔只一溝犄角立營互相聲援極爲周密而該備弁勤慎堵禦極力探防又識各汛地方之險易海賊之情形料理甚覺有方茲聞 總督部院據

漳州吳總兵咨呈將守備張有才調往洪塘堵禦將
守備趙勝移守小港洲在 督院或別有主裁但該
弁等駐守各汛與賊對壘相持日久深悉逆賊之虛
實若將兩備更換則此二營空虛兵力既已單薄調
度又復乏人萬一對河逆賊黑夜乘潮狂逞窺犯所
關非細卽另撥別員來營防守尤恐地利生疎不知
灣洲馬洲各處逆賊之情形難免疎防貽患除已備
咨 總督部院留防去後擬合就行爲此票仰該備
照依事理遵卽愈加小心多方備禦毋得少有弛懈
致負本將軍留防至意也

康熙十八年六月初一日

檄遊擊劉國興

爲恭陳竿頭沿邊情形事本月十二日據該將呈報
應添應設分布汛寨數目清單等緣由到本將軍據
此爲照分佈官兵扼守沿邊寨汛固屬緊要機宜但
竿頭逼近東石賊見我兵築寨恐斷絕糧道勢必聚
集賊眾窺伺虛實前來登犯該將正宜厚聚兵力以
防不虞若盡行分派各汛則竿頭寥寥無幾難以接
應一有贖快各將誰諉合亟飭行爲此稟仰該將照
依事理卽將所帶官兵預爲整頓聚集一處且勿分

散惟多撥哨兵遠偵密探倍加隄防聯絡朱焦二遊擊并叅將韓元朗設立烽號如有警息互相策應不得稍有因循疎忽致干

功令取咎匪輕慎之毋違

康熙十八年六月十五日

檄行福清營

為軍務事本月初六日據該將呈稱會同城守黃副將閩勘洋尾一汛緊迫江陰寇島賊夥時從出沒現在建寨亟應添防隨撥千總楊彪帶兵二百名前赴該汛協同連江營貼防官兵防守護衛夫匠建寨又查百戶樓一處乃邊界孔道要衝必須安兵二百名或一百五十名方可守禦隨暫將洋尾汛二百名之內撥出五十名着令百總林一雲帶赴百戶樓探防外但思福清之牛宅古壠漁溪江口一帶每汛各有

重兵數百名而城南之邊界杞店錦屏洋尾一帶汛兵無多是首尾兵力有餘中間單薄誠有強弱不均之勢等情呈報到本將軍據此照得福清一邑邊汛遼濶在在宜防既經撫院遣撥標協各官兵分佈貼防已爲周密但查洋尾一汛逼近逆穴要口宜厚集兵力以資堵禦而百戶樓一處邊界孔道錢糧砲火必由之路尤屬緊要今暫撥洋尾汛兵五十名分防此地勢必不敷守禦卽洋尾守汛之兵又屬單薄彼此俱見露肘殊非固圉至計今據前情合亟飭行爲此牌仰該將照依事理卽卽細勘洋尾等汛果否險要的須安兵若干名百戶樓孔道要汛的須安兵若干名酌定各汛險易或於何處可以通融酌派分佈守禦確議妥當星速回覆以憑酌奪事關邊防要務該將有地方專責毋得遲緩仍將撫院批示緣由抄呈查考速速

康熙十八年七月十一日